

განმარტებითი ბარათი

საქართველოს ორგანული კანონის პროექტზე

საქართველოს ორგანულ კანონში „საქართველოს შრომის კოდექსი“

ცვლილების შეტანის შესახებ

ა) ზოგადი ინფორმაცია კანონპროექტის შესახებ

ა.ა) კანონპროექტის მიღების მიზეზი:

ა.ა.ა) პრობლემა, რომლის გადაჭრასაც მიზნად ისახავს კანონპროექტი:

სახელმწიფოს მყარი ორიენტაციები ყალიბდება საუკუნეების მანძილზე, სახელმწიფო სიმბოლოებთან და სახელმწიფო ატრიბუტიკასთან ერთად ეროვნულ სადღესასწაულო დღედ დგინდება ისეთი თარიღი, რომელიც სიმბოლურად წარმოაჩენს ახალი სახელმწიფო წყობის მისწრაფებებს და მკაფიოდ განსაზღვრავს ქვეყნის სამომავლო პერსპექტივას.

დღეს მოქმედი საქართველოს შრომის კოდექსის მე-20 მუხლის პირველი პუნქტის „კ“ ქვეპუნქტი საქართველოს დამოუკიდებლობის დღედ აცხადებს - 26 მაისს. 26 მაისს საქართველოს დამოუკიდებლობის დღის აღნიშვნა ისტორიის გადაკეთების მცდელობაა, რადგან 26 მაისი არ შეიძლება იყოს საქართველოს დამოუკიდებლობის დღე სწორედ იმიტომ, რომ 26 მაისს არ დაფუძნებულა საქართველოს დღევანდელი სახელმწიფო.

1918 წლის 26 მაისს აღდგა საქართველოს მრავალსაუკუნოვანი სახელმწიფოებრივი დამოუკიდებლობა (რომელიც დაიკარგა 1801-1917 წლებში რუსული ოკუპაცია-ანექსიით); დაახლოებით სამწლიანი დამოუკიდებელი დემოკრატიული რესპუბლიკის არსებობა შეწყდა 1921 წლის 25 თებერვალს, როდესაც ბოლშევიკურმა რუსეთმა ისევ განახორციელა საქართველოს ოკუპაცია და ფაქტობრივად 70 წლის განმავლობაში საქართველოს რესპუბლიკა საბჭოთა რუსეთის კოლონია იყო. ხოლო 1991 წლის 9 აპრილს საქართველომ კვლავ აღადგინა სახელმწიფოებრივი დამოუკიდებლობა, რაც ასახულია კიდევ საქართველოს კონსტიტუციაში.

დაახლოებით სამიათასწლოვანი სახელმწიფოებრიობის გამოცდილების მქონე ქვეყანაში, სადაც განმათავისუფლებლობა, როგორც იდეა, ყოველთვის მნიშვნელოვან როლს ასრულებდა ერის სიცოცხლისუნარიანობისა და კონსოლიდაციის ჩამოყალიბებაში, 1918 წლის 26 მაისს აღდგენილი დამოუკიდებლობა ისტორიული მნიშვნელობისაა, რასაც ბუნებრივად მოჰყვა დემოკრატიული სახელმწიფოს ფუნქციონირებისთვის აუცილებელი ფიგურის - მთავრობის თავმჯდომარის, ფუნქციითა და შინაარსით პრეზიდენტის არჩევა.

დამოუკიდებლობის აღდგენის პროცესში ნოე ჟორდანიას როლისა და შემდგომში მისი სტატუსის, ასევე დამოუკიდებელ ქვეყანაში პრეზიდენტის ინსტიტუტის მნიშვნელობიდან გამომდინარე, უმჯობესია 26 მაისს საქართველოს დამოუკიდებლობის დღის ნაცვლად აღინიშნებოდეს საქართველოს პრეზიდენტის დღე.

ა.ა.ბ) არსებული პრობლემის გადასაჭრელად კანონის მიღების აუცილებლობა:

საქართველომ დამოუკიდებლობა ბოლოს აღიდგინა 1991 წლის 9 აპრილის დამოუკიდებლობის აქტის საფუძველზე. ეს აქტი დაეფუძნა 1991 წლის 31 მარტის საყოველთაო სახალხო რეფერენდუმს, რომელიც ჩატარდა კითხვით: „თანახმა ხართ თუ არა, აღდგეს საქართველოს სახელმწიფოებრივი დამოუკიდებლობა 1918 წლის 26 მასის დამოუკიდებლობის აქტის საფუძველზე“, ამ კითხვით ხაზი გაესვა ქვეყნის სახელმწიფოებრივ არსებობას არა შორეულ წარსულში, არამედ იქვე მე-20 საუკუნეში. შესაბამისად, 26 მაისი არის ისტორიული თარიღი როგორც, მაგალითად, 1121 წლის 12 აგვისტო, - დიდგორის ბრძოლის შედეგად საქართველოს გაერთიანება. 9 აპრილი კი არის ჩვენი დღევანდელი სახელმწიფოს დაბადების თარიღი - 1991 წლის 9 აპრილს გამოცხადდა საქართველოს დამოუკიდებლობა, რითაც მოვიპოვეთ სახელმწიფო სუვერენიტეტი, რაც ასახულია კიდევ საქართველოს კონსტიტუციის პირველ მუხლში.

26 მაისი კი, ისტორიული რაკურსისა და საქართველოს სახელმწიფოს მეთაურის, როგორც ქვეყნის ერთიანობისა და ეროვნული დამოუკიდებლობის გარანტის სტატუსის გათვალისწინებით, შეიძლება რომ უკავშირდებოდეს პრეზიდენტის დღეს.

ა.ბ) კანონპროექტის მოსალოდნელი შედეგები:

ორგანული კანონპროექტის მიღების შედეგად, 26 მაისი - როგორც საქართველოს დამოუკიდებლობის დღე ამოღებული იქნება ორგანული კანონიდან და აღდგება ისტორიული სამართლიანობა, მითუფრო იმ ვითარებაში როდესაც საქართველოს კონსტიტუციის პირველი მუხლის პირველი პუნქტი 9 აპრილს სახელმწიფოს სუვერენიტეტის/საქართველოს სახელმწიფოებრივი დამოუკიდებლობის აღდგენის აქტის მიღების დღედ აცხადებს.

თავისმხრივ, 26 მაისსაც ექნება თავისი შინაარსი და იდეური დატვირთვა, ის სამართლიანად გარდაიქმნება პრეზიდენტის დღედ.

ა.გ) კანონპროექტის ძირითადი არსი:

ორგანული კანონპროექტით ცვლილება შედის საქართველოს შრომის კოდექსის მე-20 მუხლის პირველი პუნქტის „ვ“ ქვეპუნქტში და 9 აპრილი განისაზღვრება როგორც საქართველოს დამოუკიდებლობის დღე, ხოლო ამავე მუხლის პირველი პუნქტის „კ“ ქვეპუნქტის ჩანაწერი, რომელიც 26 მაისს საქართველოს დამოუკიდებლობის დღედ განსაზღვრავს ამოღებული იქნება, რითაც თავიდან იქნება აცილებული დამოუკიდებლობის დღის აღნიშვნის ნორმათა კოლიზია.

ზემოხსენებული „კ“ ქვეპუნქტი კი ახლებურად ყალიბდება და 26 მაისს აცხადებს საქართველოს პრეზიდენტის დღედ.

ა.დ) კანონპროექტის კავშირი სამთავრობო პროგრამასთან და შესაბამის სფეროში არსებულ სამოქმედო გეგმასთან, ასეთის არსებობის შემთხვევაში (საქართველოს მთავრობის მიერ ინიცირებული კანონპროექტის შემთხვევაში):

ასეთი არ ასეობს (კანონპროექტი არ არის ინიცირებული საქართველოს მთავრობის მიერ).

ა.ე) კანონპროექტის ძალაში შესვლის თარიღის შერჩევის პრინციპი, ხოლო კანონისთვის უკუძალის მინიჭების შემთხვევაში - აღნიშნული თაობაზე შესაბამისი დასაბუთება:

ორგანული კანონპროექტი ამოქმედდება გამოქვეყნებისთანავე, ვინაიდან მისი ძალაში შესვლა არ საჭიროებს დამატებითი ღონისძიებების გატარებას.

ა.ვ) კანონპროექტის დაჩქარებული წესით განხილვის მიზეზები და შესაბამისი დასაბუთება (თუ ინიციატორი ითხოვს კანონპროექტის დაჩქარებული წესით განხილვას):

რადგან კანონპროექტი ინიცირებულია მ/წლის იანვარში, მიზანშეწონილია დროულად მოხდეს მისი მიღება, რათა საქართველოს მოსახლეობა დროულად იცოს ინფორმირებული მოახლოებულ 9 აპრილს საქართველოს დამოუკიდებლობის დღის სრულფასოვნად აღნიშვნასთან დაკავშირებით. აქვე, გონივრული ვადით ადრე შეიტყონ ჩვენმა მოქალაქეებმა რომ 26 მაისი საქართველოს ისტორიული მეხსიერების კუთვნილებად კი არ რჩება, არამედ ამ დღეს ახალი დატვირთვა ექნება და საქართველოს პრეზიდენტის დღე აღინიშნება.

შესაბამისად, მიზანშეწონილია, რომ წარმოდგენილი ორგანული კანონის პროექტი, საქართველოს პარლამენტის რეგლამენტის 117-ე მუხლის შესაბამისად, განხილულ და მიღებულ იქნეს დაჩქარებული წესით.

ბ) კანონპროექტის ფინანსური გავლენის შეფასება საშუალოვადიან პერიოდში (კანონპროექტის ამოქმედების წელი და შემდგომი 3 წელი):

ბ.ა.) კანონპროექტის მიღებასთან დაკავშირებით აუცილებელი ხარჯების დაფინანსების წყარო:

საჭიროების შემთხვევაში დაფინანსების წყარო იქნება შესაბამისი დონის ბიუჯეტი.

ბ.ბ) კანონპროექტის გავლენა სახელმწიფო ან/და მუნიციპალიტეტის ბიუჯეტის საშემოსავლო ნაწილზე:

ორგანული კანონპროექტი გავლენას არ მოახდენს სახელმწიფო ან/და მუნიციპალიტეტის ბიუჯეტის საშემოსავლო ნაწილზე.

ბ.გ) კანონპროექტის გავლენა სახელმწიფო ან/და მუნიციპალიტეტის ბიუჯეტის ხარჯვით ნაწილზე:

- 26 მაისის ნაცვლად დამოუკიდებლობის დღე აღინიშნება 9 აპრილს, რასაც ამ შემთხვევაში არ ექნება გავლენა ბიუჯეტის ხარჯვით ნაწილზე, ვინაიდან 26 მაისს თუ ხდებოდა შესაბამისი ხარჯების გაწევა, ახლა იგივე ხარჯების გაწევა მოხდება 9 აპრილს.

- პრეზიდენტის დღის დაწესებამ 26 მაისს, შესაძლოა გამოიწვიოს ხარჯების გამოყოფის საჭიროება შესაბამისი დონის ბიუჯეტიდან, იმ შემთხვევაში თუ მოხდება აღნიშნული დღის აღნიშვნა.

ბ.დ) სახელმწიფოს ახალი ფინანსური ვალდებულებები, კანონპროექტის გავლენით სახელმწიფოს ან მის სისტემაში არსებული უწყების მიერ მისაღები პირდაპირი ფინანსური ვალდებულებების (საშინაო ან საგარეო ვალდებულებები) მითითებით:

ორგანული კანონპროექტის მიღება არ გამოიწვევს სახელმწიფოსთვის ან მის სისტემაში არსებული უწყებისთვის ახალი ფინანსური ვალდებულებების წარმოშობას.

ბ.ე) კანონპროექტის მოსალოდნელი ფინანსური შედეგები იმ პირთათვის, რომელთა მიმართაც ვრცელდება კანონპროექტის მოქმედება, იმ ფიზიკურ და იურიდიულ პირებზე გავლენის ბუნებისა და მიმართულების მითითებით, რომლებზედაც მოსალოდნელია კანონპროექტით განსაზღვრულ ქმედებებს ჰქონდეს პირდაპირი გავლენა:

ორგანული კანონპროექტის მიღება გავლენას არ მოახდენს იმ პირებზე, რომელთა მიმართაც გავრცელდება კანონპროექტის მოქმედება.

ბ.ვ) კანონპროექტით დადგენილი გადასახადის, მოსაკრებლის ან სხვა სახის გადასახდელის (ფულადი შენატანის) ოდენობა შესაბამის ბიუჯეტში და ოდენობის განსაზღვრის პრინციპი:

ორგანული კანონპროექტი არ ადგენს გადასახადს, მოსაკრებელს ან სხვა სახის გადასახდელს (ფულად შენატანს).

გ) კანონპროექტის მიმართება საერთაშორისო სამართლებრივ სტანდარტებთან:

გ.ა) კანონპროექტის მიმართება ევროკავშირის სამართალთან:

ორგანული კანონპროექტი არ ეწინააღმდეგება ევროკავშირის სამართალს.

გ.ბ) კანონპროექტის მიმართება საერთაშორისო ორგანიზაციებში საქართველოს წევრობასთან დაკავშირებულ ვალდებულებებთან:

ორგანული კანონპროექტის მიღება არ ეწინააღმდეგება საერთაშორისო ორგანიზაციებში საქართველოს წევრობასთან დაკავშირებულ ვალდებულებებს.

გ.გ) კანონპროექტის მიმართება საქართველოს ორმხრივ და მრავალმხრივ ხელშეკრულებებთან და შეთანხმებებთან, აგრეთვე, ისეთი ხელშეკრულების/შეთანხმების არსებობის შემთხვევაში, რომელსაც უკავშირდება კანონპროექტის მომზადება, - მისი შესაბამისი მუხლი ან/და ნაწილი:

ორგანული კანონპროექტი არ ეწინააღმდეგება საქართველოს ორმხრივ და მრავალმხრივ ხელშეკრულებებს და შეთანხმებებს. აგრეთვე კანონპროექტის მომზადება არ უკავშირდება რომელიმე ხელშეკრულებას/შეთანხმებას.

გ.დ) არსებობის შემთხვევაში, ევროკავშირის ის სამართლებრივი აქტი, რომელთან დაახლოების ვალდებულებაც გამომდინარეობს „ერთი მხრივ, საქართველოსა და, მეორე მხრივ, ევროკავშირისა და ევროპის ატომური ენერგიის გაერთიანებას და მათ წევრ სახელმწიფოებს შორის ასოცირების შესახებ შეთანხმებიდან“ ან ევროკავშირთა დადებული საქართველოს სხვა ორმხრივი და მრავალმხრივი ხელშეკრულებებიდან:

ასეთი არ არსებობს (კანონპროექტი არ გამომდინარეობს ევროკავშირის ასეთი სამართლებრივი აქტიდან).

დ) კანონპროექტის მომზადების პროცესში მიღებული კონსულტაციები:

დ.ა) სახელმწიფო, არასახელმწიფო ან/და საერთაშორისო ორგანიზაცია/დაწესებულება, ექსპერტი, სამუშაო ჯგუფი, რომელმაც მონაწილეობა მიიღო კანონპროექტის შემუშავებაში, ასეთის არსებობის შემთხვევაში:

ასეთი არ არსებობს.

დ.ბ) კანონპროექტის შემუშავებაში მონაწილე ორგანიზაციის/დაწესებულების, სამუშაო ჯგუფის, ექსპერტის შეფასება კანონპროექტის მიმართ, ასეთის არსებობის შემთხვევაში:

ასეთი შეფასება არ არსებობს.

დ.გ) სხვა ქვეყნების გამოცდილება კანონპროექტის მსგავსი კანონების იმპლემენტაციის სფეროში, იმ გამოცდილების მიმოხილვა, რომელიც მაგალითად იქნა გამოყენებული კანონპროექტის მომზადებისას, ასეთი მიმოხილვის მომზადების შემთხვევაში:

მსოფლიო პრაქტიკა გვიჩვენებს, რომ სახელმწიფოს დამოუკიდებლობის თარიღის დღედ გამოცხადება ხდება ძირითადად ორი საფუძვლით:

- სახელმწიფოს დაფუძნების დღე: ამერიკის შეერთებული შტატები 4 ივლისი - 1776 წლის 4 ივლისს დაფუძნდა ა.შ.შ; ბრაზილია 7 სექტემბერი - 1822 წელს ამ დღეს გამოცხადდა ბრაზილიის დამოუკიდებლობა;

- უკანასკნელად დამოუკიდებლობის აღდგენის დღე: გერმანია 3 ოქტომბერი - 1990 წელს გერმანიის დამოუკიდებლობის სრულად აღდგენისა და გერმანიის გაერთიანების დღე; საფრანგეთი 14 ივლისი - 1789 წელს ბასტილიის ციხის აღების დღე. საბერძნეთი 25 მარტი - 1821 წელს დამოუკიდებლობის აღდგენის დღე; სომხეთი 21 სექტემბერი - 1991 წლის 21 სექტემბერს დამოუკიდებლობის აღდგენის დღე. ავსტრია 26 ნოემბერი - 1955 წელს მუდმივი ნეიტრალიტეტის გამოცხადების დღე. შვეიცარია 1 აგვისტო - კონფედერაციის დაფუძნების დღე;

ე) კანონპროექტის ავტორი:

საქართველოს პარლამენტის წევრი, ნატო ჩხეიძე.

ვ) კანონპროექტის ინიციატორი:

საქართველოს პარლამენტის წევრი, ნატო ჩხეიძე.